



UNIVERSITI
TEKNOLOGI
MARA

Cawangan Terengganu

INFO US\$AHAWAN

PENAUNG:

DR ROSMAN MAHMOOD

CHIEF EDITOR/KETUA EDITOR:

PUAN NIK FAZLIN HIRYATI NIK JAAFAR

MANAGING EDITOR/EDITOR URUSAN:

CIK NOOR MALINJASARI BINTI ALI

EDITOR

PUAN SUZILA MAT SALLEH
PUAN NASIHA ABDULLAH
PUAN NORHAYATI HUSIN
PUAN ROSEZIAHAZNI ABD GHANI
PUAN 'ATIQA RASHIDAH ABU SAMAH
PUAN HASMIDA MOHD NOOR
PUAN RASLINA MOHAMED NOR
PUAN SITI FATIMAH MARDIAH HAMZAH
ENCIK WAN AHMAD KHUSAIRI WAN CHEK

DESIGNER/PEREKABENTUK

ENCIK ABDUL RANI JUSOH
PUAN NOOR HAFIZA MOHAMMED

EDISI
27

No issn:1823-6421

Pusat Komuniti Desa Pemangkin Aktiviti Keusahawanan

Muhamad Asri Abdullah Kamar, Mohamad Azal Fikry Ali

Fakulti Senibina, Perancangan dan Ukur, UNIVERSITI TEKNOLOGI MARA, Seri Iskandar, Perak.

*Koresponden: masri418@uitm.edu.my

Pengenalan

Pusat Komuniti Desa (PKD) merupakan pusat aktiviti masyarakat di kampung tertentu yang diwujudkan oleh Kementerian Pembangunan Luar Bandar (KPLB). PKD merupakan penstrukturan semula *Rural Transformation Centre (RTC)* dan *Mini Rural Transformation Centre (MRTC)* yang telah dilaksanakan oleh kerajaan pada 11 Oktober 2018 [1]. Moto PKD ialah 'Satu Hentian Pelbagai Perkhidmatan'.


Penstrukturan semula PKD mengekalkan fungsi sedia ada *RTC* dan *MRTC* serta menambah fungsi bagi untuk memberikan perkhidmatan yang lebih baik kepada masyarakat setempat. Ini bertujuan membantu masyarakat luar bandar agar terus maju. Justeru, PKD mempunyai lima fungsi utama iaitu sebagai [2]:

- Pusat Latihan Komuniti - mengadakan kursus / program kemahiran untuk komuniti setempat.
- Pusat Aktiviti dan Pemerkasaan Wanita - menyediakan latihan dan program bagi pemerkasaan wanita.
- Pusat Perkhidmatan Setempat - menawarkan perkhidmatan agensi kerajaan dan swasta.
- Pusat Aktiviti Kesukarelawan - mengadakan aktiviti-aktiviti kesukarelawan melibatkan masyarakat setempat.
- Pusat Pengumpulan Produk Usahawan Desa - sebagai hub pengumpulan dan promosi produk usahawan desa.

Pemangkin Aktiviti Keusahawanan

Berdasarkan fungsi itu, PKD dipercayai menjadi pemangkin aktiviti keusahawanan khususnya kepada masyarakat luar bandar. Ini kerana kebanyakan fungsi PKD menjurus kepada menggalakkan aktiviti keusahawanan iaitu meliputi pemberian latihan dan kemahiran kepada masyarakat; menyediakan perkhidmatan daripada agensi tertentu; serta mewujudkan tempat bagi mengumpulkan produk dan mempromosi produk tersebut.

Hingga kini, terdapat sebanyak 191 buah PKD di seluruh Malaysia, khususnya terletak di daerah-daerah kecil, kawasan luar bandar dan terpencil [3]. Bilangan itu dijangka bertambah dalam tempoh beberapa tahun lagi. Daripada semua negeri di Malaysia, Terengganu mempunyai bilangan PKD paling banyak iaitu 31 buah (Rajah 1). Antaranya ialah PKD Jerangau, PKD Padang Pulut dan PKD Bukit Besi. Ini diikuti oleh Kedah (30 buah PKD) dan Johor (24 buah PKD).



Bagi negeri Perak pula, terdapat 13 buah PKD. Antaranya ialah PKD Bagan Tiang, PKD Sungai Siputeh dan PKD Seri Gala. Berdasarkan bilangan aktiviti berkaitan keusahawanan tahun 2019, PKD Kampung Jelintoh yang terletak berhampiran bandar kecil Gopeng didapati paling aktif (Rajah 2). Ini kerana ia telah mengadakan sebanyak 74 aktiviti sepanjang tahun itu kepada masyarakat tempatan. Antaranya menjalankan beberapa kursus seperti pemasaran secara atas talian, penyediaan makanan sejuk beku, pembuatan roti, penghasilan baja organik dan sebagainya. PKD turut memberikan khidmat nasihat dan sokongan khususnya kepada usahawan mikro yang baharu menceburi bidang itu dalam memasarkan produk. Pengurusan PKD juga menyediakan ruang khas kepada usahawan tersebut bagi memasarkan produk seperti ikan pekasam, air minuman, baja, bahan tanaman dan sebagainya.



Rajah 2 Pusat Komuniti Desa Kampung Jelintoh, Gopeng, Perak

Kesimpulan

Kesimpulannya, segenap lapisan masyarakat yang berminat, khususnya penduduk di kawasan luar bandar perlu mengambil peluang yang diberikan oleh PKD untuk memajukan diri dalam bidang keusahawanan. Ini kerana PKD sedia memberikan pelbagai ilmu dan kemahiran kepada bakal usahawan di luar sana. Layarilah laman sesawang KPLB di www.rurallink.gov.my untuk mendapatkan maklumat lanjut atau hadirilah ke PKD yang berhampiran dengan anda bagi memperoleh khidmat nasihat daripada pegawai berkenaan. Mereka sedang menanti kehadiran anda dan sedia membantu. Mudah-mudahan, anda menjadi usahawan berjaya suatu hari nanti. Pendapatan dijana, kualiti hidup dapat ditingkatkan, di samping mengurangkan isu penghijrahan (khususnya golongan belia) dari luar bandar ke bandar. Jika impian ini menjadi kenyataan, hasrat Malaysia untuk menjadi Negara Keusahawanan Unggul pada tahun 2030 nanti dapat dicapai, seperti yang digariskan dalam Dasar Keusahawanan Nasional 2030 [4].

Rujukan

- [1] Anon. 7 April 2022. *Program untuk Komuniti di Pusat Komuniti Desa (PKD) KPLB April 2022*. Malaysiakini. [Program untuk komuniti di Pusat Komuniti Desa \(PKD\) KPLB April 2022 \(malaysiakini.com\)](http://www.malaysiakini.com)
- [2] Kementerian Pembangunan Luar Bandar. 2022. *Fungsi Pusat Komuniti Desa (PKD)*. Putrajaya: Kementerian Pembangunan Luar Bandar. <https://ezran.my/KPLB/pusat-komuniti-des-pkd/>
- [3] Kementerian Pembangunan Luar Bandar. 2022. *Bilangan Pusat Komuniti Desa (PKD) di Malaysia*. Putrajaya: Kementerian Pembangunan Luar Bandar. <https://ezran.my/KPLB/pusat-komuniti-des-pkd/>
- [4] Kementerian Pembangunan Usahawan. 2019. *Dasar Keusahawanan Nasional 2030*. Putrajaya: Kementerian Pembangunan Usahawan. [Perbadanan Perusahaan Kecil dan Sederhana Malaysia - Mengenai DKN 2030 \(smecorp.gov.my\)](http://smecorp.gov.my)